

四庫全書

集部

欽定四庫全書

集部

待制集卷八

詳校官中書 臣 呂光復

侍讀 臣 孫球覆勘

總校官進士 臣 楊懋珩

校對官中書 臣 潘庭筠

校對官中書 臣 楊世綸

謄錄監生 臣 王錦

謄錄監生 臣 張德疇

欽定四庫全書

待制集卷七

元柳貫撰

制

趙王封贈三代制

竒林徹贈靖忠保德和義功臣太傅開府儀
同三司上柱國駙馬都尉追封趙王謚康僖
制

先德後功周室所以開守文之治左宗右戚漢廷所以

推廣愛之仁粵我熙朝肆崇勲籍爰念副駢之盛載頒
贈襚之華具官某至大能剛誠善不伐雖生知於孝友
亦世篤於忠貞配大姬車服之多而動無踰節襲元戎
旂物之貴而出則專征惜不百年成予一障方慙式商
之命用恢全趙之封死也如存極三公而論爵沒則有
謚合二美以易名以寧假廟之靈以衍配天之澤於戲
昭昭在上爾毋忘陟降之恭赫赫厥聲予亦有封建之
福歆時寵渥光對前聞

摩和納郇王贈亮節輯衆保義功臣太傅開府
儀同三司上柱國駙馬都尉追封趙王謚惠襄

制

元功次簿賢賢實著於邦彛異姓真王貴貴無踰於戚
晚爰舉追褒之典以隆勸勵之仁匪曰私親其惟本始
具官某大圭不琢雅量有容愛士甚於扶傷卹民幾同
拯溺念烈祖首歸真主茂開社稷之勲肆累朝得尚元
姬申侈車旂之錫每虛懷而挹損遄御氣以遐征是用

泉對寵光肇加美謚上公九錫既峻陟於維垣大國三
軍亦就更於全趙於以示旌勞之厚豈徒爲備物之彰
於戲扞城而矢腹心已予躬之不閱聯嫺而託肺腑賴
爾後之多賢祇服異恩式承嘉薦

專趙王贈繼志樂善全節功臣太師開府儀同
三司上柱國駙馬都尉追封趙王謚簡穆制

三恪封陳重是神明之胄外戚在漢豈皆恩澤之侯睠
爾勲賢維予肺腑惕容儀其既遠侈命數以獨隆具官

某睟若春溫嶷然山立仁民等於愛物養性推之事天
稽首而稱北藩祗服皇明之被奉主而朝上國式觀侯
度之修持一矢以招魂指孤城而隕涕屬定鼎卜年之
伊始宜出綸揚渙之有光國本王封既升庸於元宰謚
則周道爰誅行於奉常極臣號以加崇爲壻車而增賁
於戲帝室之親曰甥舅已莫資夾輔之勤君子之澤在
孫曾尚克相貽謀之永庶憑盼嚮丕昭寵休

回紇追封趙王公主

皇祖姑

王姬下嫁匪誇車服之儀戚里聯姻有煒旂常之績屬
新鼎命用錫綸音某星婺騰輝天潢毓秀正家而尊五
典出言必盡於箴規成化而本二南動作無踰於矩則
嗟月輪之既缺睇風馭以奚攀大邦爰啓於封圻貴主
肇隆於位號式流終譽豈務私恩於戲褕翟褱衣等殺
猶存於后飾畫堂甲觀宴娛緬想於神遊咨爾營魂承
予休寵

阿實克呼都克妻封趙王公主

皇姑

周厚懿親服在宗盟之列漢尊太主具如藩國之儀方
背樂於燕詒宜亟申於褒寵某天支秀暉坤德柔嘉肅
雍觀婦道之成庶倫以正順巽得家人之吉時義有閑
被象服以攸宜乘翟車而肆覲朕方惇叙九族問及諸
姑爰疏封國之恩以楸保邦之慶於戲彤管有煒尚無
忘女史之書大禧是承以克享壽眉之介益昭殊眷不
格繁釐

阿喇特納巴拉追封趙王公主

皇姊

公主亦號帝姬周道實嚴於貴貴侯王厥有國邑漢儀
兼示於尊尊允懷同氣之親誕錫均釐之貺某懿恭維
則柔順可貞純化覃於家邦美行應乎圖史昔祖姑監
國輔成定命之基今伯姊在天與享肇禋之福號名既
正本幹益隆庶徼顯考之靈以篤孝孫之慶於戲下王
后猶一等宣車服之維多封異姓以七旂尚旂章之未
備舉茲常典慰爾營魂

集賢侍讀學士中奉大夫李倬封贈二代制

祖懋故河東宣撫檢察使贈嘉議大夫吏部
尚書上輕車都尉追封冀寧郡侯謚文惠

錄再世所以廣恩朕亦嚴於馭貴活千人者必有後爾
惟篤於象賢賡時進讀之臣應我申褒之律其昭先美
以示隆施具官姓某祖具官某直養以全剛靜修而致
遠方聖武伐太原之日挈生靈歸中國之仁布衣而偕
前籌幕府以爲巨障寇恂還守河內上功正切於轉輸
馬援去卧壺頭壯節自甘於歛退迨今墓上征西之字

比之襄陽墮淚之碑燾後而德已滋詒謀而報不食爰
舉易名之典肆加胙土之華於戲命數視其孫惟母嫌
於少殺節惠壹於行豐亦詫于非常咨爾營魂歆予寵
渥

父昱故成都路防城軍民總管贈中奉大夫
河東山西道宣慰使護軍追封冀寧郡公謚
忠敏

予爵而論其世王者推廣孝之仁積德不必其身大夫

有顯親之義若時令子維予近臣追榮式應于邦彝初
命遂加於公袞具官姓某父某官某卓爾能立休焉有
容參元戎閫外之謀得君子師中之吉蓋嘗執筭而計
兵食入關而課民庸孔明恢蜀道之圖非蔣琬莫安留
府杜預卒荊州之伐而羊祜不見成功勲名在二子之
間報効稽十年之後流之長者必榮洛苗之遂者維芑
縻來宣庸畀於高牙考行仍申于美謚於戲氣爲物覓
爲變尚炳然江漢之靈秋曰嘗冬曰烝宜秩爾豆籩之

薦死如可作寵至其承

祖母張氏追封冀寧郡夫人

尊祖必有所儷國家重賢賢之恩抱孫今見其成君子
謂善善之澤肆因眷獎併示追褒具官姓某祖母某氏
德順而莊教慈以肅公卿取爲家法娣姒親若母儀屬
世嗣之升朝從良人而命爵小君所以序貴式增愉翟
之華大夫則知承宗有煒形鹽之薦庶茲幽窆服我寵
章

祖母富察氏追封冀寧郡夫人

王父以孫爲尸本支宜於百世婦人從夫之爵恩禮視
於諸侯其廣朕私以洪爾慶具官姓某祖母某氏柔儀
範俗淑行正家早親筐筥之勤晚遂卮匱之養及燕謀
而始大侈象服以斯皇一命爲榮尚不食生賢之報九
原可作庶其知稽古之崇有奕寵休無間冥漠

母仇氏追封冀寧郡夫人

朕大倣官聯咸有羔皮之德肆惟本始孰無烏哺之恩

褒親所以勵人臣錫命所以重國典具官姓某母某氏
出自仕族動爲女師采蘋恭其先在家循於法度殷雷
勸以義從政敏其勤勞所嗟風木之悲不見樹萱之色
母貴今以其子婦爵則從其夫周制稱寡小君爾尚服
漏泉之澤冀郡惟方千里予敢愛大國之封既極哀榮
亦隆備享

翰林承旨王約除兼太子詹事制

太子繫國本既茂建於元良詹事猶古官茲重煩於耆

艾爰當禁林之直乃陪儲幄之遊命出自中聽學於外
某學知體要行應樞機深醇有儒者之風謙退持廉士
之節頃久勞於民社遙峻陟於詞垣廼先正其心無若
裴垕之敢諫顧可託以子何嫌周勃之少文惟折旋規
矩之必端資左右侍御之皆正此事要關於輔導若人
無愧於典刑班躋少端尹之聯省給悉歸於唐府位冠
大長秋之上進趨壹用於漢儀萃茲眷禮之優示我責
成之重於戲以汝爲商山之羽翼是將觀德教於初爲

予隆周室之本支以克繇燕休於後勉摠忠蓋嗣有寵
嘉

真大道教祖師無憂普濟真人劉德仁加封真
君制

蓋聞大道常清淨自化固盛治之攸資至人以澹泊爲
宗矧前聞之足證庸加寵澤增賁玄門某凝神若虛應
物無迹知性皆本有混同孔老之間然言不離筌終始
天人之際雖深藏而弗售已妙用之顯行今熙朝克美

於象元肆列聖重光於巽命是用躋爾仙階之貴昭予
帝祉之隆以迓蕃釐以開來裔於戲騎日月而遊四海
想神馭之如存官陰陽以遂羣生尚物情之咸賴祇服
茂典益暢休風

東嶽泰山加封大生制

帝出乎震始萬物以司方嶽峻于天配二儀而作主惟
此云亭之祀具諸封禪之文肆考彝章特崇徽號仁存
率育德載無疆出雲雨於虛空割陰陽於昏曉中州扶

興之氣豈祝融獨得其宗泰山維魯之瞻蓋龜蒙奄在其下廼欽柴而備禮洎平土以告功是爲王者受命之符亦曰庶民錫福之地想廟容之如在申帝號于大生以薦明釐以昭靈貺於戲金匱開而玉策得豈其爲方士之虛談白麟至而朱鳳來厥亦有聖人之能事歆予時渥惟乃之休

誥

江州路聖治太平宮九天採訪使應元保運妙

化助順真君加封誥詞

朕聞大道亦強而名固具胚暉之造至人以虛爲用實
高監御之司睠茲衡嶽之佐神魏鎮匡廬之治所式稽
彝典申錫徽稱某氣孕亭毒之先功參化育之內崇巒
穹谷亦閱景以揚靈法象真圖雖無形而有物受任十
華之使寓神八極之遊蓋衆靈竦聽其撫訶而三界總
歸於巡徼謂青城丈人各主分地厥有貞符迺朱陵仙
府別啓洞天合嚴明祀是則微顯闡幽之故昭乎禍淫

福善之機用加四字之真封對答萬年之光命於戲六
號之式頒邦國朕方櫛秩於無文八卦之德曰鬼神爾
尚克昭于丕應祇承茂渥益暢玄風

興國路九宮山太平護國真牧妙應普興真君

加封誥詞

神張姓

蓋聞神仙能伏光匿景豈有迹之可稽山川亦舒翹揚
英知炳靈之攸在櫛秩式躋于明祀出綸爰畀於真封
某和以天倪動而淵默蓋根諸性命之學至誠灼見於

著龜故形爲禍福之言妙用不離於橐籥宋代嘗禮之而賜號匡君乃邀爾以結鄰迄今羣帝之追陪猶爲九宮而來下於戲茅初成駕龍而去長司句曲之天許仙平騎鶴而歸不忘城陽之宅以時盼蠻服我寵嘉

表

進南郊鹵簿圖表

陽郊展米冀天地之顧歆法駕示儀象星辰之次舍茲命工人而加繪輒干瞽御以上塵蓋聞大事莫貴郊裡

盛禮必有搏節故鹵簿總屬車之次而公卿在駟乘之間昉周制而已然稽唐儀而始備後先清道單行宣六引之威左右畫衣雜采占五方之色此文事必戒武衛凡樂聲實具禮容乃若古今輿輅之等威上下旗旂之度數非資圖寫曷究徽章雖成能無與於咨詢而曠典充宜於藻績用旌微贊期補明時此蓋欽遇云熙洽宣光柔嘉作則戢干戈而肆夏繼序斯皇欽歷象以授時和邦維允方圉丘之建祀矧大盾之在廷彰彰物采

之多表表聲明之盛臣致君心切議禮才踈託以丹青
紀太常十二旂之部傳之琬琰揚天子億萬年之休

國子監賀太室慶成表

廟祧序正示惟辟以奉天宗室崇成知敬親而尊祖聿
觀丕構益壯洪基蓋聞昭穆配乎二儀禘祫等之百世
故王者有萃渙之義而天下形孝敬之風昔周制都宮
位皆東向及漢立原廟意在別祠使非楹桷之穹崇曷
稱堂筵之修廣聖作適逢于今日孫謀克篤于前人欽

惟云

云

圖大宅中本仁祖義念垂衣而致治躬服采章

沿乘輅以為邦首嚴仗衛企想月遊之舊著為時祀之
彝方圖上於土功且備聞於金奏臣某西雍應職北闕
趨班髦士攸宜叅工歌於九夏孝孫有慶格神保於萬
年

大駕北還起居表

振蹕上京脩累朝之故實回輿北闕肅萬乘之威儀百
辟承風羣黎矯首蓋聞周室嘗別營於西鎬漢皇亦時

幸於東都將令侯度之益恭以示王靈之咸被戒先驅
而鞭日御甫瞻羽衛之隆得壯士而挽天河已覺氛埃
之淨故所至則如甘雨之澤物仰之猶若景緯之麗空
茲一人舉動之間惟萬世治安攸繫欽惟云懋昭湯
德丕顯文謨民協于中雖明刑而不犯皇建其極實歛
福以用敷從官方遄侯於雞翹父老宜竦聞於鳳吹臣
某躬塵器使耳屬鸞音行葦頌功知明時之有道蟠桃
獻壽祝萬世之無疆

御史臺賀正表

帝王御歷方開有道之長春秋首時式正履端之始乾
旋坤轉雷動風行中賀盛德在躬深仁及物恩覃肆宥
歛五福以用敷治格重熙歌九功而惟叙穆穆龍樓之
養繇繇燕翼之祥元會充廷泰和成象臣忝司邦憲肅
奉朝儀升中呼嵩嶽之三願符聖壽執法近太微之次
誓竭臣忠

監修國史賀正表

天明即命紹開帝歷之隆王朔體元序正人時之始大

鈞坎北和氣冲融

中賀

德協重華道昭全美御端門而

肆赦萬寓熙春坐宣室以受釐五辰順軌方九賓之在
列萃諸福以來臻臣忝冒師垣兼塵史館獸樽奉酒庸
申効於嵩呼鳩筆紀謨願同符於洛畫

宣徽院賀正表

寅正首月用泰始以授時申命自天體乾剛而出治一

元斯暢庶彙咸亨

中賀

祖義本仁宅中居正民和物遂

方臻康艾之期文恬武熙迄底安強之効極怡愉而致
養罄溥率以來臣廷列百僚高呼萬歲臣幸聯通列肅
奉上儀趨未央前殿之朝預觀圖籍總宣徽南院之務
益謹饗羞

泰定甲子賀聖節表

六甲初元月次黃鍾之琯萬年景運天開紫電之祥八
表頌聲兩間協氣中賀體乾剛健乘泰吉亨為國家有
九經人文丕顯建皇極欽五福帝訓是行廣聖學以緝

熙啟神謀而絕武爰上玉杯之壽用祈寶命之申臣職
守宗祧躬趨班署日添繡線式觀龍德之中春在彤庭
茂衍龜疇之福

箋

宣政院賀千秋節箋

天臨朱邸肇迎仲月之陽電繞紫樞式應前星之瑞宮
闡同慶寰宇交欣中賀生稟懿恭德全仁智承至尊守
重器親總政機選端士聞正言益隆國本方元良之建

位宜壽考以維祺某幸綴邇班載逢華旦宣風西域既
來九譯之環稽首東儲願上千秋之鑑

國子監賀受冊箋

皇儲正位肇新玉冊之頒宗祀綿休丕衍瑤圖之慶泰
和斯暢震道乃行中賀蘊德誠明問學光大教諭成而
三善得帝訓時欽元良建而萬邦貞民情咸戴方彤廷
之脩禮宜朱邸之迎祥某職忝膠庠心馳鶴禁日輪月
暈願有繼於雅歌乾符坤珍益懋開於興運

狀

升祔禮成請推恩賞狀

竊惟帝王之興實由祖功宗德積累所致故制為廟祀以極崇報之禮配天同大猗歟盛哉粵昔世祖皇帝肇建宗廟創修禮文聖子神孫繼紹纂承廼英宗皇帝斷自睿謨載廣廟室至於今上皇帝嗣服之初始克落成爰以泰定元年五月十四日奉遷祖宗神主妥靈新廟廿六日欽奉顯宗皇帝英宗皇帝神主升祔朝祭盛儀

續典照映古今凡諸臣子獲與奔走實為非常萬一之
遇蓋有殊特之禮必有殊特之恩宋金以來每行大禮
則必等第頒賜行事之臣以為非此則無以均隆錫福
于下也今朝廷丕崇太室遷主禮成而顯宗皇帝始由
晉邸昭受大號與英宗皇帝並祔于祖宗之次此皆曠
世甚盛之舉謂宜參酌古今特推恩沛自獻官而下行
事官員等第賞賜庶幾有以隆熙朝闋祀之貺而書之
信史亦將示法于將來

請添造單羅法服狀

欽惟世祖皇帝肇建宗廟始定祭禮每歲孟冬卜日大饗命大臣攝行其事以時方寒沍故自獻官下至與祭諸職合用法服等皆以夾羅為之因襲已久遂為故事至如南郊太社雖別造祭服亦止循用夾衣之制比年英宗皇帝更定四孟時饗以來每遇孟夏孟秋行禮之時被服夾衣升降拜跪往往暑氣蒸鬱流汗沾濡其于肅將祀事之意或者不無乖戾今檢照到亡宋太常因

革禮祭服條內該真宗大中祥符六年准詳定所言月
令孟夏初衣暑服孟冬始裘今尚衣庫袞冕等蓋每歲
仲冬祀圜丘所服皆是夾衣宜依冕服制度改用單羅
則是古人制作衣裳唯欲適宜未嘗以單夾為拘以此
叅詳若依太常因革禮所定典故除太廟南郊太社各
有法服外各處權宜添造單羅法服全副二十身專充
夏秋祭祀獻官近上職事行禮之用庶幾馨香達於神
明而於毳祀之儀不為無補

薦赫舍哩希元狀

竊惟用人當求實才薦賢務合公論其人賢矣則稱其
才而薦之非過舉也取其長而用之非市恩也方今設
科取士之外凡隱晦丘園才德彰著之士又令所在以
其名上聞朝廷急於得賢之意茲可見也比年以來若
楊靜起於成都即除四川提舉史灼董士廉起於燕南
即除翰林編修國子助教皆由布衣以薦入官今更數
除率能崇尚名節而有難進易退之風則薦非謬薦用

非濫用亦已明矣伏見都城處士赫舍哩希元年踰半
百篤志窮經元於易春秋二書精考密察探賸鉤玄不
背先儒訓釋之旨自得聖人制作之微安貧樂道若將
終身而孝友之行形于家庭信義之實稱於朋友邇者
翰林集賢諸老監察御史惜其老于文學累嘗交章論
薦以為京師首善之地有一安恬之士獨能遺外聲利
篤學力行起而用之則可以表倡四方興起風化非直
為希元私也

某

猥以庸虛忝職奉常日虞曠敗獲戾官

歲蓋討論禮典稽考儀文必得通經學古之儒老成名
德之士乃為稱選某熟知其賢用敢舉以自代如蒙轉
而上聞將赫舍哩希元權充博士代替某名闕必能修
舉職業上副朝廷優賢崇禮之仁

祝文

行祀嶽瀆祝文

中嶽

維嵩作鎮奠於土中蟠地與厚配天比崇雄亘秀峙二

室西東亦有河洛融液宣通曰神鎮星實主實宗為周
生賢肇漢登封載其嘉應昭示無窮明德宜祀爰有廟
容於皇聖元越古同風祝號祭式與時並隆皇帝曰嘻
邦彞是庸汝維侍臣往即祠宮熏香奠幣明薦余衷承
命載驅敢有弗恭練日既良卜牲斯豐神之格止有懌
無恟百祥來集洽于時雍天子萬壽維神之功

南嶽

列嶽在地實張四維神氣所載猶體有肢昔舜修方望

秩以祀虞德昭升五典克徽矧茲衡山屹鎮南離七十
二峯峩峩魏朱陵之洞祝融之司泄雲吐霧闔闔神
機乾綱既正以奠民麗叙祭有章百王承規皇元繼照
文德敷施稽古作制絜祀維時牲號斯崇神人具宜天
子在御宰臣考儀迺下璽書香幣載馳爰既涖止卜日
諏龜嘉薦誠陳有飮菲菲宸心既將神亦宴娛昭茲靈
貺報以蕃釐於萬斯年格於隆熙維嶽維固維國之基

淮瀆

淮出胎簪其源甚長禹始導之乃自于唐有山桐柏鬱
乎蒼蒼會泗而沂茲焉濫觴美德維神其靈孔揚列在
中祠視秩侯王聖朝崇祀厥有彝章實籙斯幣實函斯
香亦既涖止練日維剛牢醴在筵式薦苾芳皇明祁祁
淮波泱泱萬年有永神降之康

濟瀆

濟初維沆發自垣曲孟陽二源始匯而畜是為龍淵實
制坤軸噓呵雲霧變化忽倏貫河溢滎有顯有伏及其

注沂遂列四瀆爰始秩祠名在宗祝皇元稽古大正疆
服祀事孔時載祗載肅聿修歲羹薦此芳郁昭其格思
報以景福天子萬年神有嘉穀

北海

望祭於
濟源

天地之間環海為區北有瀚海窮髮之隅粵初望祀亦
聖所謨賸惟濟源茲神之廬有赫玄靈可考不誣並祠
嶽鎮矧在輔都維聖憲古載敷命書迺馳香幣迺闖神
居靈兮來下皇情孔孚祚胤明昌聖有貞符

策問

國學私試十一首

問井田廢而阡陌開鄉遂都鄙之制不可復矣厥後名
田之請限田之議均田之法作輟紛紜前以為利後以
為害識者有遺憾焉唐之計口授田有口分有世業粟
稻曰租綾絹曰調與夫歲二十日人力之庸其取之民
者如是而已可謂法之善者也亡幾而遂廢不舉豈其
制雖有所本而於時或非其便歟抑人多田少必不得

已而後廢之歟井疆遠矣計口授田之制今猶可踐而行之也願與諸生訂其古法之可以宜於今者

其二

問自秦滅經籍至漢興易書詩禮春秋稍出而樂遂亡矣或曰孔子之時摯干繚缺適齊適楚適蔡適秦鼓入河鼓入漢少師磬襄入于海而器與人已不復傳非亡于秦也蓋雖制氏在漢世為其官頗能記其鏗鏘鼓舞而不能言其義則河間所獻又特雜采諸子之言而已

宜後之論樂者紛紛而莫之底定也以隋唐周宋諸儒之所更定而猶不無遺憾焉則待其人而後行固自有時哉今明天子在上有意於制禮考文之事蒐攬廢墜討論而興起之抑豈無其人乎則推其端而究其末引而信之以備六經未備之經而聳吾元之德於秦漢之上顧不甚盛甚韙也歟試相與誦其所可取者焉

其三

問凡祭祀必有樂學校之祭小則釋菜以食為主大則

釋奠以飲為主故舍菜合舞於春頒學合聲於秋而禮
記之書特以仲春上丁習舞釋菜命之樂正又謂凡釋
奠則必有合於時釋奠於先聖先師先老若所謂樂祖
者無專祀也其習舞與聲皆大合六代之樂北齊嘗以
太牢釋奠孔子配以顏回設軒縣之樂六佾之舞至唐
始以孔子為先聖顏回為先師兩京用宮縣令三公攝
事隆禮備樂斯亦至矣然宋既加王儀其樂第用判縣
施之堂上而又不設舞於庭蓋宮縣判縣一豐一殺當

時議禮之臣其所損益亦有意歟抑有歌無舞又與古人習舞合聲之制有戾歟今仲春上丁將舉祀禮則禮樂之事亦諸生所當講切而究明之者願紬繹其說

其四

問自田不井疆民不什伍而分田令賦造器制祿起田役作軍旅凡先王所以維繫其民之意於是微矣秦開阡陌漢事兼井人忘重遷俗尚流寓至晉稍明土斷之制逮齊復申黃籍之令故戶口漏於國版而夫家脫于

聯伍者皆受而注之其後百家有譜東南別族僑舊錯處姦偽益滋寬鄉為壘狹邑成聚雖以闢田增戶列之五事責之守令而猶未之有止也今欲上知寧人之方下知安土之利存亡更守出入相同有無相貸疾病相救一道德而同風俗顧以何術而躋登茲試考覈古今之宜以詳著於篇

其五

問下情之通塞治亂得失之變係焉工箴警詩道謗市

議不以人廢言之意蓋三代同之自是而降漢最近古
凡所論建必合其同或諸侯王之有詔或列侯宗室之
與議或達二府之僉謀或用諫大夫之決策以博士議
郎之小臣而猶得與丞相列侯二千石並預諮訪亦幾
乎公天下以為心者矣然言路浸廣而治道浸微豈苟
同挾和之論徒為希意順指之私耶抑履霜堅冰之喻
尚不足以開自牖納約之明耶其不制為一定之法者
無亦示夫廣聽兼覽之公不於其人而于其言耶今朝

廷求言視漢而益切顧處士橫議與學校正論孰得孰失必有能辨之者矣

其六

問三正之起尚矣說者謂夏正建寅為人正商正建丑為地正周正建子為天正夫子因魯史作春秋凡國君即位必書元年春王正月夫春秋尊王之書以正次王以王次春則正月者周天子所用之正也先儒謂其以夏時冠月而以周正紀事正月非春時固不易然書序

一月戊子師渡盟津而經言十有三年春大會於盟津則一月者周之一月亦遂以為歲首矣不知春秋假之以立義者亦他有所考据乎或者又謂周人改月而兼存夏正其證已多見於經傳所載之文乃若周官既曰正月而又曰正歲豳詩既曰七月九月而又曰一之日二之日左氏固已惑之而孟子所記徒枉輿梁之成則一以當代正朔言也夫子以四代禮樂答顏子為邦之問首之曰行夏之時此則聖人經世之法之所寓如是

而猶有焚經以建亥者矣不然則建辰建卯將何時而可定乎搖光昏見於子而陽氣已潛萌乎黃鍾之宮此天之所以為春而萬物之所由生也治歷明時實為王政之大端舍是而不之講則非當務之急矣

其七

問六官之屬備于周合而典則柄統散而庖翟春藁莫不有政有事今其書詳焉漢去古遠大抵多倣秦舊而法制日密名數日滋以建武之減損猶不能革元始之

更置下逮宇文拓跋號名復古而建官之意邈如宜其
效之若彼也夫以六典之書為周公始致太平之具奈
何一用于後世而遂起變法更令之端則周之制果不
可行歟蓋嘗以今而揆古則今之官猶古之官名之存
猶實之存也國計主於大農而金穀之虛贏豈不可考
公卿領於尚書而庶官之殿最豈不足覈居是官舉是
職而其道可以達之天下國風刺候人春秋譏世卿吁
可畏哉孔子曰修廢官而四方之政行焉舉逸民而天

下歸心焉。今聖賢相逢而天下猶有廢而不修之官逸而未舉之民。此則明詔所為拳拳者也。善乎先儒之言曰：「有關雎麟趾之意而後可以行周官之法度。」然則今非其時歟？彼其藉以為變法更令之端者，夫亦泥其迹而不知其意歟？諸生蒙被菁莪樂育之仁，是皆有民物之責于身，試訂言之，抑以觀所學。

其八

問古之王者立廟以萃人心之渙，蓋制為祀享而天下

不一之論定矣故上自商周有功之臣從于大享祭於
大烝而漢以降則惟烝嘗配食於庭崇德明勲之意示
人心之有統而且以勸嗣臣也唐武德中嘗論次太原
功臣由裴劉而下總四十三人貞觀所錄亦五十三人
長孫趙公實為之首而房杜王魏無差等焉他日配祀
高祖之庭者殷開山劉正會淮安河間二王而太宗之
庭則房魏屈突通高士廉而已裴劉之績固不多于鄭
渝二公靖元二王也邪梁鄭尚矣乃若無忌如晦與珪

之風節抑猶在蔣申之間也邪凌烟之圖贊即麟閣雲
臺之模寫彼一時之定次果不足以望十八侯之功籍
也邪將不一之論第能定之於一時而未能祛千載之
惑也邪先儒以大烝為祫祭謂禘于夏而祫于冬耳其
與周禮秋烝冬嘗之制異矣然貞觀之議亦曰禘及時
祀功臣皆不應享則三年一祫五年一禘以其合於天
道之大小而言之大則人臣不與而小則人臣可以兼
及之歟崇德明勲今猶古也其即夫天理人心之所安

而稽之往制之得失以詳著于篇

其九

問道馭天下之術既微而庠序學校之教以興聖人之
於人有甚不得已焉者矣蓋成周以三物四術舉於鄉
升于司徒意猶為近古至西都則孝悌有科孝廉有舉
命之九卿命之郡國而不舉孝為不奉詔不察廉為不
勝任失當者有罰紛紛若是其與鄉舉里選之意果有
同歟當時率以戶口多寡察人口二十萬一人滿百二

十萬六人限之以四科而博士御史三輔縣令於是乎
取至博士弟子亦命二千石察其好文學敬長上肅政
教順鄉里者得詣太常受業然武帝初弟子員千餘人
成帝末增至三千人豈計口察人之路不廣而受業太
常者特二千石之所羅致也歟且善事父母為孝清潔
廉隅為廉而又博綜經籍窮闡微奧其選艱矣今考之
於史以廉舉者若趙廣漢朱博薛宣黃霸尹賞不數十
人而以孝廉為郎者自京房外亦不多見則計口以察

大郡滿六人止者抑豈過計歟大抵法之涼貪皆不能以無弊後之議者或以新衣好車為不廉而藏輿服絮壺飡者得以盜名檢或以割股廬墓為非孝而揖諸生閉空舍者得以著行義一是一非其間相去不能以寸公論尚得而貸之歟蓋漢承秦戰爭之後借鋤取帚之俗未革謂彼能孝親而弟長則知所以治身而推之可為吏矣此高祖轉移斯世之一機也是其同乎成周者果可以其迹而論之歟今朝廷設科取士先德而後

文必孝弟稱於鄉信義服於友始得以名上有司固已合成周先漢之制而一之矣則郡縣之所舉館學之所升凡欲為天下得人以推廣主上好德賢賢之仁心猗歟休哉橋門多士方鼓勇作氣以俟決戰則夫微之古事而驗之時宜固辭鋒筆陣之一助也其毋以吾言為贅焉

其十

問儒者之學要以明體而適用故養之之至蓄之之深

則其奮發為事業為文章必皆碩大光明可以貽諸後世而無愧彼或以成敗利鈍論人者失之遠矣季漢諸賢以名節高自標表至於矯枉過直而諸葛孔明躬耕南陽抱膝長吟自方管仲樂毅時其知者不數人而不知者未必不以為是矜名飾譽者之為耳及先主起蜀一聞徐庶之論三往乃見其畫為跨荆益和西戎撫夷越之策善矣遂能挈成敗之機約合孫權挾飛雲之衆圍取成都延建興總政一試于南而資用以饒治戎講

武從容北舉二䟽之陳開朗激烈忠誠所據豈徒文乎
哉乃若制木牛流馬之運演兵法八陣之圖雄據武功
雜耕渭上深謀定慮有足稱矣使亮而未死則舉魏併
吳興禮作樂漢之為漢直反手耳議者乃謂其制戎為
長奇謀為短是得為知孔明哉由周而下遭時之難而
處英雄之不幸者孔明也挺身託孤不放不攝而人無
間言權逼人主不疑不忌而士知所勸所謂約官職從
權制開誠心布公道蓋無非帝者之政也觀其規模宏

遠真足以鼓舞豪傑憑藉一世而身隕未幾炎祚遂熄
使操持妄議者猶得伸彼以抑此故其知孔明者不過
以為是特將畧之雄耳而不知儒者明體適用之學至
孔明無餘蘊矣先儒曰孔明有王佐之心而道則未盡
又曰孔明廢幾禮樂夫亦安所指哉講肄之暇試究評
之

其十一

問舜始命官契為司徒亦既任之以敷教之事矣至后

夔典樂則於胄子之教尤特隆焉蓋自天子之元子衆
子至於公卿大夫士之適子通謂之胄子是皆與有天
下國家之責使非有以涵養其性端而和柔其氣質則
樂德樂教何以深入乎心而直者必失于溫寬者必失
于栗剛必至虐簡必至傲矣歷夏而商而周若大司樂
之建學政若師氏之三德三行保氏之六藝六儀所以
教養國子而進之於道者非於貴遊子弟而有私焉故
周召毛原劉尹榮單之族皆世食其祿並儀朝著與周

匹休直教使然耳蓋天下者天下之天下受之先王固將與夫勲庸之子姓共有之周之法豈獨致隆于公卿哉以國子之繫國體其重如此則教之之隆所以責之之至也漢世吏二千石至六百石及關內侯五大夫皆得任子若侍郎郎中庶子洗馬制賁郎將往往以父任為之成帝時伏湛始由父任為博士弟子其顏色和順身體修治者以為宗廟舞人而董仲舒謂子弟未必皆賢王吉謂子弟率多驕傲或欲除去其令或欲稍減其

員此徒見任子之弊而不知救弊之源無怪其論議之紛紛也今國之胄子有學有教固已大倣虞周之制而出於父任又皆壹用漢法所謂樂德樂教乃未之聞焉至於舞宗廟之酎者世或非賤之矣孟子曰仁之實事親是也義之實從兄是也又曰樂之實樂斯二者樂則生矣生則惡可已也然則五典者仁義之實而六樂豈自外至者歟彼六律六呂五聲八音之為用又豈非三德三行六藝六儀之所發施也歟抑樂之為樂偶于六

藝之中其為教亦有輕而有重歟或曰春秋譏世卿為尹氏也則雖周召毛原劉尹榮單之族其必資教以成者庸可得而後之歟雖然虞周之教其致隆如此今亦豈遂不可得而復之歟虞之胄子周之國子漢之任子其所以為法亦孰得而孰失歟願悉相與商訂其說

御試一首

代趙承旨作

朕觀帝王制治之道未嘗不承天以從事法祖以立政然而仁義彰施恩德和洽則本之教化成之禮樂其効

固亦可睹已孔子稱舜無為而治觀其始於修已而終
於恭已勞於求賢而逸於得賢無刑而威於刑不賞而
勸於賞能大有為而後無所為舜果無為者哉迺若克
艱以圖乂昭德以建中不遑暇食而即夫康功田功無
作好惡而至於會極歸極是皆有以協和天人之際而
臻茲至治之休三代受命之符厥有在矣朕惟我國家
基業之崇土宇之廣固已掩跡虞周寬絕唐漢而傳序
在予式承祖宗全付之重憂兢寅畏凜乎朽索之馭而

春冰之履也顧詔書屢下而惠化未孚德澤屢降而陰陽未應豈銓條有失於精覈而進賢之路或壅歟抑吏治或過於煩苛而致理之績有歉歟伊欲顯忠而遂良興廉而起孝通教化之原達禮樂之用使世底隆平民躋仁壽其以何方式濟登茲子大夫學究終始其於賢良三道之要春秋一統之指講之熟矣悉著于篇朕將親鑒

待制集卷七

欽定四庫全書

待制集卷八

元 柳貫 撰

謚議

徐鳳謚文莊

儒者事業蘊之則為德行發之則為政蹟辭章此其服
習於家庭詩禮之訓而漸濡於師友源流之正者有自
來矣故江南諸道行御史臺侍御史徐鳳踐歷中外垂
三十年純白一節終始不渝方待制集賢奉檄遼東賑

灾備患克盡乃心同知河南以誠率下吏警民懷興學
治田勞効尤著為郎右曹治書憲府經綸庶政執持風
紀寬而不弛密而不苛退讓自將曾無矜耀本諸所學
有光先美大用未究論者惜焉易名定謚應合禮經謹
按謚法敬直慈惠曰文執德不矜曰莊請謚曰文莊

濟古爾台謚忠肅

蘭艾同畦則芳馨失所忠邪並列則謹正靡安蓋觀君
子小人進退之機而知陽明陰濁消長之候羣儕既力

孤立易搖此所以姬旦近親屈平貴族猶不為流言讒口之所容者也故四川等處行中書省平章政事濟古爾台早食世德親結主知始寓直於省闈遂典司於藏鑰固已屢裨廷論深究利源由憲府以延登為元寮而增重持侍御史之簡則風采凝嚴進中執法之聯則紀綱肅穆而屬浙省構隙海漕飛章密被選掄首當訊鞠辭所逮及聽必簡孚求情於隱微之中論讞於法意之外具獄既上罪狀悉明雖顯戮藁街遠投四裔而人自

不寬以至雲南伐叛之臣陰受種羗款兵之賂奉辭問
罪議法用權於時裔土之遙始服祥刑之正及于晉司
丞轄參秉樞機方妙幹於化鈞已潛移於政柄譬之威
鳳在樹鵠梟懷憎猛虎栖山豺狼反噬雖名假寵以補
外實乃棄賢而遂姦公則辭謝登途懇誠戀闕洎宸衷
之啓悟侈恩賚以追頒無何中路魂飛神州望斷愁雲
結恨流水含悽故識者莫不驚嗟而憐人自謂得計不
知漢廷望重由汲黯之居中唐室謀輕以真卿之出使

蓋公之血誠知有君父而不知有讒臣知有國是而不知有顧忌蹇蹇之節諤諤之忠可以振肅簪紳可以懾恠佞春風和氣周流於秋霜烈日之中全德純臣公則奚讓謹按謚法危身奉上曰忠執心決斷曰肅請謚曰忠肅

郭昂謚文毅

古者詩書禮樂謀帥以智為先而勇次之粵若世祖皇帝開疆拓境服叛夷凶一時選用文武之士隨才受任

各即有功是皆不世出之臣卓然能以勲名自致者也
故廣東道宣慰使郭昂始以布衣納策參贊軍幕從征
數年卒能以智謀勇功翼成渡江之績收撫廣南招懷
峒獠先聲所至莫不震驚觀其橫槊賦詩下馬草檄沈
機敏識槩世仁威雖古良將復出未敢多讓謹按謚法
博聞多見曰文致果殺敵曰毅宜謚曰文毅

錫都謚孝恭

以孝移忠者人子之大節執事有恪者人臣之至誠此

跋履險艱而不忘於將母出入中外而不懈於事君生
有餘榮沒有餘惠者也故宣政使兼資國院使錫都少
稱驍勇長益敏明懷策來朝奉身委質念慈親之待養
則行挽安輿屬明主之需賢而進當迪簡以至討叛西
域獻俘大廷多出奇謀以裨成美凱還萬里痛隔終天
負土為墳揮涕為雨洎從二聖於巡幸親見萬方之樂
推聞忠讜之言則協誠獻可嫉姦邪之黨則顯論指陳
雖宣政資國漸陟崇班而彌綸輔相實觀來効益以揚

名之志形為載德之容合是易名庶幾無忝謹按謚法志不忘親曰孝愛人長悌曰恭請謚曰孝恭

李侗謚章肅

德深者其衍必滋勞大者其發益遠乃聖主肇開於洪業而仁人自獻其良謀克有國功以傳世胄故集賢侍讀學士李侗由其父祖疊建勲庸遂從西蜀之征首佐中軍之畫蓋義理融貫則謀畧沉深識見敏明則樞機慎密以才自致隨試有稱於是筮仕省曹陞華泉府果

奮擊姦之勇以為靖亂之先瀛館延登方求賢而報國
臨江出牧知共理以綏民雖讒言之如焚汔善政之不
泯以至劍泉移守淞漕轉輸郡治以孚鹽筴以正所謂
有儒術之緣飾無吏事之煩苛者也晚還朝廷薦為壽
俊以言語議論為黼黻采章載觀書畫之流傳猶起縉
紳之潤色然而篤於繼志故佞者不容強於執心故直
者不悅嗟蓋棺而論定宜節惠以飾終謹按謚法敬慎
高明曰章執心決斷曰肅請謚曰章肅

鄭阿爾薩蘭謚敬敏

蛇虺肆毒則不擇類而傷儉邪醜正則不越門而禍以
為故家令族之所在是乃直言讜論之攸宗其好合近
乎黨同其矯非似乎立異一加文致遂傳刑誅思昔至
大之間實啓姦臣之釁雖任情淫殺濫及無辜然稔惡
自夷不俟旋踵因其誣讎之跡知其猜忌之心公論尚
得而貸之乎故武衛親軍都指揮使鄭阿爾薩蘭粵從
再世歷事累朝唯殫盡瘁之忠以服貽謀之永殿巖襲

爵而禁旅無諱祖笏重光而師干不試自倚遭逢於聖
代寧能屈折於權門遂使萋斐為文織羅成獄上刑而
伏斧鑕慙孰加焉盡室而化囚拏忍乃至此事實關於
國體恨空結於人心悵魂魄其何之痛祚胤之未立或
者謂李陵三世嘗多殺卒之愆故子美衆賓盡坐祠神
之罪是則諉之家禍誰將服此官刑所賴仁后御天綸
恩昭雪發宿奸於俄頃還舊物於散亡可以疏淪沉寃
可以挽回元氣然而節惠之典雖後十年垂世之名已

登信史則夫國家所以閔恤忠賢之裔者其於彰往勸來豈不厚哉謹按謚法夙夜就事曰敬佐國逢難曰愍請謚曰敬愍

嚴度謚貞憲

故國之有世家猶深林之有喬木其封培之厚則積久而愈茂其蔭藉之廣則無大而不容是生聳壑之才實負干雲之氣為清廟之栒葉為明堂之棟梁隨所用之無不得也故甘肅等處行中書省左丞嚴度生長勲閥

被服文儒昔武惠之建行臺為國家而保東魯如手足
之捍頭目勞佚之均戚休方大舉平南而嗣子于役渡
江銜命欲持口語以代干戈踰嶽遭兵至以頸血而膏
原野及乎四方底定諸將論功首錄羽林之孤即試海
沂之守薦由郡貳專領藩方治多尚於教條憂每先於
民瘼于是蜚聲朝右舉最臺端謂世德之作求則官箴
之式正祥刑按部節鉞屢更分閫調元疑丞載踐知明
體而適用不吐剛而茹柔所謂直養以全剛靜修以致

遠則西平之有子鄭公之有孫庶其似之禮重易名士
當論世考之國典職在司存謹按謚法清白守節曰貞
文武可法曰憲請謚曰貞憲

王晦謚文靖

作室之材求之鄧林成器之金出於麗水故才之萃聚
必以其地而見之奮發亦以其時乃若東原實望全魯
方至元之極盛群英又以偕升由上有作人之君則下
多自致之士然而衆君子維持之不足一小人猜阻之

有餘興言及茲良可重慨故廣平路總管王晦奮由孤
子秀出輩倫拔於其鄉遂陟東曹之掾少展其用已動
當軸之知佐畫禮闈乘驄憲府儀文序正章疏指陳皆
能煥發儒猷孚合朝論視韓盧張崔之儔奚限今古在
李孟間徐之列孰敢後先會舉平南之師妙選贊籌之
彥屈居郎署參掌兵機幕府上功賞無虛級轅門納策
出即良謀振義旅於潭湘脫生民于孥戮蓋仁言之一
發果天意之旋回及乎作牧藩州宣威帥閫疲精于南

浮北走成治於近說遠來撓筦庫之姦媮則貪墨者惡其害已發倉廩之儲峙則尸素者嫉其微名雖地官稍示內遷而親嫌尋已外徙迹其詭計寔昧初心甫遷太守之符遙易大夫之簣謂公論為不足恃則英才美德寔斯世之采章謂名器可以力求則高爵厚祿皆吾身之機穽淹回於三品之秩驅馳於一紀之間昔之摧沮者未必獨存而今之悵慕者適以增歎于焉定謚雖曰計資持是易名猶為考實謹按謚法德美才秀曰文仕

不躁進曰靖請謚曰文靖

李諤謚端憲

兄弟同世固本天常師友一門實備家訓乃若吳郡二
陸蒼山三蘇並擅美於時流芳于後維有是父則有是
子不知其弟曷知其兄昔文正起家伯季競秀如墳麓
迭奏如華萼交輝至今流風善政之存慨其斯文後死
之歎故廬州路總管李諤以知見為學以篤實為行出
使而見金已明辭受之義贊籌而論讞遂成簡閱之孚

洎參宥府密謀深惜國家大體謂徵兵萬里今或無名
然啓釁一言後必多事識者服其所見之遠而知其所
至之宏於後憲節五更守麾再易彈擊不遺于權倖攘
除必盡于根株民懷去思吏仰成式蓋其以理義為悅
心之味以恪恭為立治之符載歌常棣之詩宜配甘棠
之詠考其資秩徵之誌辭誅行易名抑以勸善謹按謚
法守禮執義曰端行善可記曰憲請謚曰端憲

陳思濟謚文肅

開一代之人文必有一代之制作非智足以騰蹕今古
勇足以排抑姦邪仁足以存是理之公義足以行是理
之正則知管仲之計利或不知郅子之官名知黃霸之
理民或不知張湯之律議維有體而有用知柔而知剛
故能布令頒條立經陳紀卓然聳吾元之德於盛漢之
表而煥然熙吾元之績於黃虞之間也僉河南江北等
處行中書省事陳思濟從世祖於潛藩覩飛龍之昌運
於時海宇未一川陝維雄擇遣重臣住殿西服掾曹載

筆幕府上功觀其策畧之多奇信其才猷之足倚輒從
外屏入佐中書凡諸憲度之恢張命令之出納必上稽
經誼而下適人情謂臺察為風紀之統司所以維持乎
國是忠良為生民之元氣所以固護乎朝綱至今令式
之昭垂猶覺樞機之周密方其權姦柄政虐焰熏天首
以制用立司旋以尚書建省屬拜御史遂率同寮伏陳
舉劾之章顯斥淫縱之罪以對辯為失體以盡言為納
誠夫何大器難容一麾竟出由州符而分漕節換帥鉞

而乘廉車驅馳於楚越之郊出入於仁吳之會視法令
若家庭之教詔知租繇係田野之慘舒勸分以卹灾借
輸以代賦不赫赫取譽不察察為明里多受廛之氓部
有解印之吏甫徙簽於汴省已遂掩於泉局蓋其所學
本自碩大光明故其所志兼欲修齊平治雖早收朝蹟
卒老宦塗不能還坐廊廟以究其蘊蓄之宏而制為章
程以貽厥謀謨之永則四方維則萬世維行其短其長
孰得孰失可以較然而無惑矣施於有事不若著見於

文顯於一時不若彰灼於後謹按謚法修治班制曰文好德不怠曰肅請謚曰文肅

孟淳謚康靖

自罷侯置守而大郡所治至數十萬戶以其有養謂之司牧以其有教謂之師帥漢法太守祿二千石駕五馬車朱幡皂蓋行省風俗或終世不遷其官或三年輒易其部民安樂之視如嚴父慈母國制大郡為府府有總管統治州縣繫民戚休則司牧師帥之責萃於其身矣

故常州路總管孟淳未及弱齡襲其父爵以二品之秩
佩七郡之符計其所蒞若太平之控扼大江婺處之依
阻巖險信微之介居閩楚隨俗為治不猛不寬推其仁
愛惠利之心以成慈祥豈弟之政使知禮義則民自懷
柔去其太甚則俗自遷革引年謝病竟以考終則夫紀
載之歌頌之尸而祝之將直儷美於桐鄉之朱邑石室
之高朕雖不至九卿不登三事抑何慊哉矧惟祖父揚
于異代茲服官箴光昭前聞計資定謚厥有彝典謹按

謚法保民迪吉曰康寬樂令終曰靖請謚曰康靖

李榮謚成肅

古之善治審其所尚或好仁而好義或用吏而用儒所
尚既定則因之濟時而利物昭德而顯功其所成就猶
一道也故湖廣等處行中書省叅知政事李榮以刀筆
筐篋之餘為經濟彌綸之蘊屢當任使已見器能即尚
右而轉東曹遂叅陪於國論自度支而領憲部尤慎守
於邦條觀其大節之建明知其忠誠之發越洎持帥鉞

出鎮藩方屬遭叛逆之擾邊能使黔黎之安堵以至力
陳買馬之害備殫饋餉之勞禁暴戢貪揀灾捍患其計
慮之定智畧之宏則經術為之本根義理為之涵蓄故
祥刑出節參預借籌方企想其還朝忽含笑而入地考
其初試迄於有成以一心之公為衆善之長如伯禹之
治水行其無事如孫子之制兵用之若神不有易名何
以示勸謹按謚法德見於行曰成執心決斷曰肅請謚
曰成肅

張士觀謚文愨

唐制學士演絲綸太史制褒貶俱號清切之選是為獻
納之臣迨于聖朝悉歸詞掖故文章優贍則足以敷達
皇明筆削森嚴則足以恢張國是但稽官簿豈限年資
所以聚天下之豪英而為儒者之幸遇也故翰林學士
承旨張士觀篤學成志能賦蜚聲不眩歸於葩華自殫
窮其根彙于時魯多君子道際明時芸館編摩出三長
于初試薇垣供奉成九制於一揮方騰序進之章乃堅

補外之請終更郡貳遄涖奉常屬圖任于舊人俾參尋
于故步竟由論譔厯踐清華蓋一品崇班至若循堦而
拾級乃四朝實錄率嘗約例以推凡載窺簡汗之光猶
覺管彤之煒然則言精而事掾誠立而辭修非其德盛
仁熟曷以臻茲謹按謚法勤學好問曰文誠以致志曰
懋請謚曰文懋

巴圖謚元獻

成周盛時官人以世而毛原尹單之族亦皆懋德懋功

以能承上休寵其植本之固其流澤之滋視夫徼榮於
一身而子孫不旋踵影滅響絕無可復考則裁者培之
傾者覆之豈不繫乎人哉故江南諸道行御史臺御史
大夫巴圖早以世胄入官而秉德端懿宅心靖淵文采
彬蔚克濟前美屢更憲節再鎮藩垣以寧謐為出治之
體以忠貞為報上之誠臨危制變守節不渝猶能為人
所難晚以太子賓客召還朝廷啓沃之言多本仁義以
目青辭尋拜南臺大夫復引疾不起聖皇御極來朝京

師薨於郾中天下之士咸嗟惜之而河隴吳楚之民至
于一飯必祝此豈聲音笑貌所能致哉蓋其先世有大
功在盟府官勲土田錫予蕃厚恩禮視諸侯王至公之
身脫去貴富其服食節約不異寒素死之日無餘帛美
粟貴而能貧可謂賢矣謹按謚法忠肅敬懿曰元賢德
有成曰獻請謚曰元獻

劉二巴圖爾謚武宣

緊昔世祖皇帝天啓神武恢張帝圖命將出師誅殘討

逆所向無敵卒成伐功亦惟受任之士克秉戎昭顯著
勞効為四方之藩屏為王室之扞圉更數世而無乏人
之嘆休矣盛哉故湖廣等處行中書省平章政事劉二
巴圖爾早叅行伍洞識樞機始以從攻襄樊畧定淮楚
之功承上恩寵錫名予爵尋領衛卒專征北庭修耕戰
備攻守卒之叛衆畏懾欵塞降附其後福建湖南二廣
江西草竊間起雲南思播兩江溪峒種羗成釁授節臨
戎以全制勝功最一時賞賚狎至在行樞密則由簽院

進副使在行中書則由右丞進平章歷江西湖廣川蜀
安南四省其馭軍撫民之政平允詳核先聲所屆莫不
威懷服勤王家垂四十載而西南一邊視如老羆當道
猛虎在山其去留用舍足以繫人重輕所謂爪牙之臣
庶幾似之矣謹按謚法師衆以順曰武力施四方曰宣
請謚曰武宣

邁珠謚文簡

傳不云乎非天子不議禮不制度不考文然則有聖人

之德而又居天子之位乃能因時制宜以成一代之典章將必有不世出之臣彌綸翼贊于其間故法範之垂則鴻猷之暢也品式之備則休問之彰也維昔世祖皇帝平一土宇肇新禮制始定廟祧而領之太常序正朝班而統之侍儀時則呼圖克約蘓公實以通材敏識左右經畫厥既成功而公之子孫羣從咸食其德出入班行踐修職業往往有聞于時君子之澤引而勿替其可徵哉資德大夫侍儀使邁珠實公之兄子也幼侍公側嘗

聞禮樂之要稍長入直禁衛給侍裕宗皇帝於東宮及
世祖親征納延嘗在行間師還錄其勞効有旨命中書
授官時權臣柄政第以五品秩出試郡高密無幾權姦
即誅召至京師見上便殿特授同知都護府事寵賚尤
厚成宗臨御再進秩二品至大三年山東饑仁宗居潛
命乘傳賑卹還奏稱旨而省臺亦交章論薦改通政使
尋除湖南廉訪使在官一年部內清謐以母老乞歸侍
養遂拜侍儀使使脩其世父之業贊理儀章整肅班著無

違節失度上每嘉賞焉時天子方向意文學人謂且大
用以疾而薨嗚呼惜哉蓋其從宦三十年試牧祥刑僅
再閱歲出入禁闥忠勤一節弗懈益恭論其世德雖漢
之秬侯萬石君家有不過也然則啓大於前而光紹於
後茲無憾矣謹按謚法忠信接禮曰文平易無疵曰簡
請謚曰文簡

元明善謚文敏

文章者華國之黼黻而潤世之膏澤也天之於人才其

生之不數則其賦之不浮有弘深茂美之資而當碩大
休光之運敷之為瓌辭暢之為崇議可以震耀皇明可
以宣示臣軌道德仁義由是而發舒禮樂刑政由是而
寧一譬之景星卿雲白麟朱鳳其出也則為治世之貞
符顧欲常常而見之豈可得哉迺若翰林學士元明善
氣非養而自充學隨用而不竭進逢昭代汔展宏猷如
高檣健帆翼順風而駕洪濤其行無前旁觀以為神而
不知其才之致是者非時之力也蓋自其初以太子文

學事仁宗皇帝於潛邸固已用其詞藻深簡上衷厥既
正位宸極遂超掌內翰班治立制贊畫居多洎英宗皇
帝踐祚尤以修舉儀文討論典章為事每羣議大廷徐
出片言莫不脗合于古顯宣於今故以之長春官而議
中書者此文之著也以之出涖鄂省而叅其政事者此
文之施也所學之蘊纔一二攄之已足飛英而騰實顧
大用不究識者有遺憾焉周旋班著幾二十年而一時
典冊詔令勲賢銘誄與夫浮屠老氏之宮豐碑鉅刻照

映後先皆能鋪張景鑠垂範貽休以至筆削三朝實錄
藏之金匱而為昭德表功之地者尤稱良史之才惟英
君諡辟重熙累洽于上故其雄文健筆得以增徽承煥
於下自建元以來儒臣被遇之盛未有若茲之侈者也
以如是之才膺如是之眷而或者猶不能無少年用事
之譏然則蓋棺論定今其時矣節惠尊名庸可後乎謹
按謚法德美才秀曰文務時成志曰敏宜謚曰文敏

董士選謚忠宣

自古君臣之際蓋必真元之氣一會而後文武之才並
用揆之以時不數數然也乃世祖皇帝紹隆景運不闡
宏猷時則有若一二世臣出其智謀勇功先後禦侮以
翊濟大業恢張盛治不特宣光於一時而留遺聖子神
孫閱世數四尚足以繫天下之望成安強之勢則夫褒
典之加顧可于斯而獨後哉故陝西等處行中書省平
章政事董士選自其弱齡起從其父忠獻公全師南伐
已能用其策畧先登取勝宋平第賞超授官勲尋領禁

旅卮直殿巖占對之間明敏亮直上知其才每器異之
踐揚中外屢被親擢其位軍政則再歷行院簽樞密其
總憲綱則一試南臺遂為中執法其殿外服則由江浙
江西丞轄進河南陝西平章政事率以能選不階黨援
方辭河南退休於家會仁廟御極有旨謀議朝堂首條
時政十四事以對其言一本經義蓋公之於學知其大
者故見之設施有綱有目而進薦人才如恐失之後多
有聞于時武畧文聲進退咸裕可以彰累聖之知而示

世臣之軌矣薨葬五年有司乃始下其易名之議於是
世皇之謨訓炳其未遠而儀刑元老之存者無幾考其
治行質之古人則勿欺之謂忠昭問之謂宣於公無愧
焉耳以茲定謚登之功載尚俾來者之有稽也謹按謚
法世篤勤勞曰忠能布令德曰宣請謚曰忠宣

姚燧謚文

天地貞元之氣一會則聖神代作揚熙秉耀承華協瑞
以開太平而必有不世出之臣挺生其間攬結粹精敷

為制述於以增煥盛德大業而聳之三五載籍之上蓋
數百年而得一二人焉其有關於氣運者如是豈徒文
乎哉乃若先正許魏文正公之在吾元實當世祖皇帝
恢拓基圖之始倡道明宗振起來學一時及門之士獨
稱集賢大學士姚公燧為能式纂厥緒以大其承然觀
公之言而考乎文正公之學則其機籥之相須殆不啻
山鳴而谷應雲興而龍翔也故大德至大皇慶之間三
宗繼照天下又寧而公之文章蔚為宗匠典冊之雅興

詔令之深醇固已抉去浮靡一返古轍而銘誌箴頌之雄偉光潔凡鏤金刻石昭德麗功者又將等先秦兩漢而上之以闔夫作者之域排沮詆訾不一二而家傳人誦已十百雖欲掩之孰得而掩之哉他日良史執筆以傳儒林則公在文正之門豈直儕之游夏而已也易曰黃裳元吉文在中也然則以之節惠公奚歎焉謹按謚法博聞多見曰文敬直慈惠曰文請謚曰文

王仁謚正肅

君子之學其居安資深而行著習察者將以立其誠蓄其德而非以徒識前言往行為足多也及乎進逢所知而時不我舍則亦隨試効用知夫深厲淺揭之宜在已而不在人故其出處行藏優有餘裕如真鴻威鳳翔乎寥廓而網羅矰繳之睨其上下夫孰得而羈獲之哉是則學之為効焉可誣也謹按河東山西道肅政廉訪使王仁自其始學固已秉志之懋用功之密鄉評里譽浸浸有聞稍長從廉恒陽王行省荆南而能益見其為歸

州安撫副使王所署也民初款附能結之以信持之以公州則順治其簽江東建康道提刑按察司事江南建臺之明年也移淮西丁內艱去再移山東又移燕南按厯三部劾發奸賊吏當其罪狀身受顯罰而沒齒不寃及進陝西河南二副使拜治書侍御史河東山西廉訪使則旣病矣獨治書侍御史嘗一登朝其所論建根據憲章不為繳繞識者賢之八拜官而四不行在仕之日不多於閒放之時然觀其出處之大節綽綽如也蓋其

所學始則究覈羣史以推古今成敗通塞之原終則涵
茹六經以窺義理廣大精微之蘊其居官之理其事親
之孝其修己之敬本之君子之學則所謂尊聞而行知
者庶其無歉焉耳謹按謚法莊以率下曰正好德不怠
曰肅請謚曰正肅

程鉅夫謚文憲

易曰黃裳元吉文在中也蓋以柔順而乘剛明則其暢
於四支發於事業正位居體極其美而臣道得矣是則

所以為文也惟昔世祖皇帝以義聲仁威撫一疆宇而尤欲恢張文治以收大同之効一時服在臣列多以文學不次致用其煥發猷為增飾制作傳之數世有不盡焉嗚呼盛哉謹按故翰林學士承旨程鉅夫躬負宏博之學進遇隆平之期江南初定以牧守子姓入尚宿衛英才穎出遂為世祖皇帝所知言議上前動合旨意六遷而以侍御史行臺江南乘傳訪求遺逸就轉福建廉訪使移湖北召入翰林為學士尋以本官議進中書至

大中復出節山南仁廟御極徵為翰林學士承旨大策
明謨多所資決而於國體民命之間每深致意今觀其
論建而知其以柔居剛以順為明之美得於坤六五之
正而世祖皇帝所以留遺神孫於數十載之後卓然為
守文垂憲之本者不可及矣謹按謚法敬直慈惠曰文
行善可記曰憲請謚曰文憲

阿里伯謚忠節

自古忠邪不並列誠偽不合謀所以讒構害正媚疾成

風而治否相尋雖明盛之世有不免焉及乎事久論定
迹遠聲彰則一時之屈百代之伸較其得失有由然矣
謹按榮祿大夫平章政事阿里伯自其廼父際遇太宗

皇帝憲宗皇帝

闕

慎終如始而公尤為世祖皇

帝

闕

從潛藩以至御極密畫奇謀讜言正論

啓沃居多中統初元即佩虎符領中書左右

闕

使受任之專群臣莫並及其弼成混一之業身居

銓衡之地而權姦用事正直靡容深中

闕

包藏禍機，投置死所，使善類褫魄識者憾焉。幸神聖鑒

臨

闕

錄其遺孤以明大節。至今忠耿之垂猶

闕

之

闕

譬之蕭艾，既秋而荃蘭流馥。鳴皋鍛羽而

闕

悼沒世之莫追，幸易名之有典。庶因定謚

闕

謹按謚法，危身奉上曰忠，直道不撓曰節。請謚曰忠

節

劉慤謚孝靖

古人

闕

而仁鄙壽夭之見於人者，常足以觀其

豐嗇厚薄之分焉則上之所承下之所授亦豈無自而然哉謹按故司徒邢國公劉慤以文獻公為之父以承旨公為之子人門之美有稱於時而公以耆俊介居其間知謹身之為孝約已之為安黃髮龐眉享有樂康合於仁者必壽之義矣蓋文獻公始以鴻碩之才出應世祖皇帝休光之運修治定制多所裨贊不居其豐斂退終身積其贏餘敷遺於後及公之身而蓄播益勤封殖益厚所謂實大而聲宏源遠而流長者承旨公則當其

時矣方其晉長詞垣屬仁宗皇帝恢弘孝治惇右文儒而公既躋上壽遂以一品爵秩即家授之以為公榮洎登九十命大臣按修故事錫宴賜杖儒臣作為詩歌又勅光祿日給尚醕所以示尊禮高年之意休矣盛哉越三年公薨英宗皇帝寵之賻襚朝士引紼迓葬故邱生榮死哀固無遺憾而禮重易名考德揆行厥有攸司謹按謚法尊仁安義曰孝寬樂令終曰靖請謚曰孝靖

王侯謚憲肅

鷹隼不擊則梟鸞不分霜霰不嚴則蕭蘭不辨故儉人之抑損則善類之獲伸此所以君子進退之機為正論消長之候也謹按故大名路總管兼府尹王侯比由治縣已著能稱其後屢更憲節再裁勇冠以其扶衰濟弱之心形之激濁揚清之政問當道豺狼而狐狸斂跡若在山猛虎而藜藿滋榮鋒愈挫而愈銛氣無暴而不餒甫叅朝議遯易羣符雖坎壈終身莫酬素志然清明在上實亮孤忠禮重易名士當考行申加美謚責在有司

謹按謚法行善可記曰憲執心決斷曰肅請謚曰憲肅
杜思敬謚文定

培之厚者其末大得之深者其至遠故求忠臣必於孝
子之門論王佐必考正學之自謹按故中書左丞杜思
敬由其父奮起行伍顯立勲勞遂得給衛世祖皇帝潛
邸及遊許文正公之門益知講學源委初仕御史臺都
事轉治書侍御史權姦伏辜臺臣以失言併逐世祖獨
亮其忠命涖職如故無幾除戶部侍郎厯右司左司郎

中出為順德安西總管就僉陝西行中書省事尋移汴
梁總管復入為侍御史議事上前首當帝意拜中書叅
知政事進四川行省左丞以疾不行召為中書左丞彌
綸庶政匡贊洪圖大抵以忠誠為格君之本以安靖為
出治之基進退適宜始終全德所謂西平之家有子而
河汾之門多賢豈不信哉諫行易名所以勸善矧茲承
弼厯事累朝可無美謚申示褒旌謹按謚法敬直慈惠
曰文踐行不爽曰定請謚曰文定



待制集卷八